

四庫全書

史部

欽定四庫全書

史部

浙江通志卷一百

四 二至

詳校官給事中臣戴璐

檢討臣德生覆勘

總校官編修臣倉聖脉

校對官監丞臣張曾炳

謄錄監生臣王思誥

欽定四庫全書

浙江通志卷一百二

物產二

嘉興府

嘉禾 至元嘉禾志序嘉禾在春秋為攜李吳黃龍

三稔以禾生由拳野故名

至元嘉禾志是郡號為澤國原野衍沃田宜麥

禾陸宜麻豆其他有資於民生日用者煮水成鹽殖蘆為薪地饒蔬茹水富魚蟹而已至若草木禽獸果實藥品之類亦他郡所有絲綿絹帛視苔雪則次之

稻 萬歷嘉興府志地宜稻其品香粳稻粒瘦長雪

色味香甘又名紅蓮稻紫芒稻紫殼白粒雪裏揀

色白粒大稈軟有芒蘆花白即晚白稻早白稻中

秋熟皮芒白米赤揀選稻色微黃鵲不知秋初熟

又名麻子烏

海鹽縣圖經凡種稻先擇種立夏糞秧田浸種浸五日始秧撒之秧田又五

日秧始齊芒種後夏至前為撒時多雨墾田平之又碌之且糞之乃拔秧栽之無雨則澆水為之用桔槔具糞也以猪灰以豆餅或以草入之河泥爛而用之栽秧二十日乃盡盡以木板叢釘於上柄以長竹以疏苗之行令根易行也又五六日乃耘耘者去草也爬苗之肋置所去草於下助糞力也

耘凡三再耘為下農一之多第矣耘之服曰馬曰
盡臂曰臂麓曰指耨皆以竹為之苗葉利懼傷膚
也跪而耘膝故無蔽多傷矣稻水種也天澤未易
常微枯棹力居多惟立秋前十日宜稍乾之令根
固餘日水晝夜不得乏絕收穫多寡壹視耨水勤
惰凡稻處暑而胎白露而秀秋分而秀齊寒露而
盡實霜降而黃立冬盡刈矣刈稻有鏢形如鉤稍
潤打稻有床以竹為櫛取其易落磨稻有磬用木
或用土而齒之輕則不能去殼重則懼傷米也凡
田一畝用種七升或八升穎六為肋肋八為箇畝
獲稻為箇者三百六十上農遇歲箇可得米七合
畝可得米二石五斗也近水者單車水稍遠者雙
車悉用人力高阜者輿水
間用牛車而耕仍用人云

糯
石門縣志穀中糯盛行有旱糯旱糯中秋糯猪血糯

晚秋糯矮脚糯香粳糯鴨嘴糯羊須糯泥裏變

天啟

平湖縣志糯之品金釵糯粒長鵝脂糯一名羊脂
虎皮糯色斑十月熟馬鬃糯攤子糯白殼糯西洋
糯竈王糯羊鬚糯蘆花糯禾錄糯宜釀酒禾地多
植糯而作釀不敵西吳東越者此水性之異也
謹按嘉郡古稱嘉禾其土原屬膏腴而治田亦得
良法凡傍田之處必開淩蕩又必開塍以通溝洫
如遇旱歲車灌之方亦備勤農遇熟年每畝之穫
可得二石餘除食足外皆集於震澤鄉鎮而糶之
惟勸農之方自不可怠穎實之後收割宜早
納場之後攤晾宜時又在長民者之督率爾

麥
嘉興府志大麥不甚適用漬之可為飭小麥即

為麪者麥在北方花晝開且冬入窖出汗去濕氣

故益人南方則否藟麥無芒色黃可作飯及餅餌
酒家蒸之成酒名燒酒味最烈又有糯粟此種北
地最多呼為高粱江浙則僅於墩岸間植之

豆 萬歷嘉善縣志菽也小者曰豌豆長者曰豇豆
香者曰香珠豆以形而論如刀者曰刀豆長而如
帶者曰裙帶豆曲如爪者曰龍爪豆似羊目者曰
羊眼豆以色而論白曰白豆赤曰赤豆綠曰綠豆
黃曰黃豆黑曰烏豆縑者曰僧衣豆斑者曰瑪瑙

豆以時而論當蠶時生者曰蠶豆黃梅時生者曰

梅豆胥五奉九南田高不宜水稻多種白豆

天啟平湖

縣志白扁豆一名延籬豆又名羊眼豆諺云延籬花開挾纊子來長者名龍爪小者名一茶匙扁青豆色綠者名鸚哥綠香珠豆縹色而香大者名僧衣豆黑豆細者名馬料豆豌豆一名小寒豆豇豆一種名裙帶豆刀豆以形名

菜

萬歷嘉善縣志禾人以此為業白曰白菜青曰

青菜似波者曰波菜生可噉者曰生菜甘者曰甜

菜不植而野獲者曰薺菜古者菜亞於穀故穀不

熟曰饑菜不熟曰饑誠重之也

臺心菜 嘉興府志冬種春生其莖始發摘食之禾人稱臺心取其子搗作油名菜油

冬菜 嘉興府志一名白菜夏種冬收禾人以鹽貯之名鹽蘆菜以供一冬及初春

莧菜 萬歷嘉善縣志有紅白二種芥菜之屬也斷鼈肉為塊以莧覆之則活故忌莧與鼈同食

瓜 萬歷嘉善縣志瓜類有八一曰甜瓜其形圓而

有稜生時堅脆可入醬為菹俗呼醬瓜熟則酥美
俗稱熟瓜二曰冬瓜大如枕可煮為羹亦宜蜜浸
三曰西瓜其種傳自西域故名本地間有之多販
自蘇松四曰筍瓜即生啖亦宜醃藏五曰王瓜如
生瓜而色黃即王善菜也六曰絲瓜嫩時可食老
則筋頑難食惟取穰去垢而已七曰壺蘆即匏也
有甘苦二種大者形如冬瓜而過之八曰苦瓜

嘉興

府志西瓜色有青白質有長圓沙瓜味
最佳又甜瓜一名香瓜小者名金鵝蛋

芋 本草綱目出自海鹽苗高三四尺莖赤葉似石榴而短厚又似石南葉開細白花

葱 天啟平湖縣志地種香細過於太湖粗種又一種名龍爪葱

筍 天啟平湖縣志家園所產有杜筍鞭筍燕來筍

茶筍

貝瓊遊山記及山巨竹千挺
醢筍而食肉雖美不能過也

香蕈 乍浦九山補志松花蕈山之有松者皆產惟陳山東麓為多三月間松花入土至四五月經雨

後即生至八九月又生鮮肥滑嫩素品之上味也
他如玉蕈松蕈雷蕈胭脂蕈味皆不及惟笑蕈牛
矢蕈不可食土人能辨之

茶食 嘉興府志補食品中有茶食糖纏髓餅春餅
桑 石門縣志其屬有晚青桑白皮桑荷葉桑鷄脚

桑扯皮桑尖葉桑火桑山桑紅頭桑槐頭青鷄窠

桑水竹青烏桑

萬歷嘉善縣志南鄉有桑不及桐鄉之盛種法有七一收搥二播種

三置棚四灑澆五耨耘六割桑七移栽嘉興府圖記濮院鎮流水環遶土沃宜桑

柘閒窗括異志柘湖中小山生柘樹因以為名

松柏 貝瓊遊山記笈山松柏萬株環合無路俛首
松下雲氣相盪不啻魚泳波濤中

槌 朱彝尊鴛鴦湖櫂歌注城東北隅有槌子樹傳
自西竺來者

穀 嘉興府志穀樹賤而易生土人取其汁以書金
字

水楊 本草綱目楊樹葉短柳樹葉長又一種曰蟠

楊耐水隄涯間多植之

西河柳 本草綱目一曰攄嘉興產陸絳所謂皮赤如絳者也

檇李 花史嘉興城西南地產佳李因名檇李嘉興府志相傳淨相寺僧坊舊栽真檇李其種漸絕今惟有徐園李甘脆埒名然亦不可多得

朱彝尊駕鵞湖擢歌

注徐園李核小如豆絲懸其中相傳即檇李也張堯同淨相佳李詩地重因名果如分沆瀣漿因思吳越戰未敢盡情嘗朱彝尊檇李詩佳果先秋熟來禽也不如瑤光珠斗散青簡素王書瘦地翻宜

嫁柔條亦易舒最防黃霧塞務使綠陰疎暑暘
偏潤風吹粉未除豐肌須小摘纖核乃中虛銷夏
吾鄉好分甘佛寺初曾
留西子掐當食轉憐渠

李桐鄉縣志出濮院鎮之南名柏家李萬歷嘉善
縣志嘉善李不甚佳有青梢黃姑二種

梨侯鯖錄語兒梨果實之珍因其地名耳秀水縣

志禦兒產玉乳梨

陸垞題醜梨詩并序醜梨出色
之東貌雖惡而風味絕勝聞嘗

進御因賦五言灰貌凝清古霜津溢脆甜而嫌湯
後白心慰邑中黔美實鍾寒谷珍嘗近御奩彼姝
徒冠玉爭
得似無鹽

桃 嘉興府志五月桃小八月桃大有合盤桃形扁
似合又李公桃無毛而色紅然終不及北產之佳
白楊梅 朱彝尊鴛鴦湖棹歌注超山產

棗 正德崇德志縣北錢林村為吳越錢王舊館後
為證聖院園多無核棗與語兒梨歲獻錢王

瑣瑣葡萄 紫桃軒雜綴神農九草之一中土久有
不俟博望從西域帶來也吾里東塔朱買臣墓有
之

蓼蓼 石門縣志野葡萄也

菱芰 萬歷秀水縣志秀水水實之品菱紅有三種

沙角環菱鍋窰蕩青有二種餽飢菱尖角菱

紫挑軒雜

綴兩角而彎者為菱四角而芒者為芰吾地小青菱被水而生味甘美熟之可代食飯其花鮮白幽香與蘋蓼同時正所謂芰也春秋時吾地入楚屈到所嗜其即此耶此物東不至魏塘西不踰陡門南不及半路北不過平望週遮止百里內耳

芡 萬歷嘉善縣志俗呼鷄頭葉似荷而大苞莖皆有刺苞內著子多其實補精小兒食之易長故有

延年之說

地蒲 嘉興府志地蒲出嘉興又一種屋蒲可以為

匏

梅 嘉興府志江梅最多綠萼為佳又有紅梅玉疊

諸種

山茶 嘉興府圖記海鹽常氏園有滇茶一本丹葩吐

焰照五里外

玉蘭 羣芳譜五代時南湖中建烟雨樓樓前玉蘭花

瑩潔清麗與翠柏相掩映挺出樓外

紫藤 朱彝尊鴛鴦湖擢歌注城南西板橋至項襄
毅墓下紫藤花最盛

錦帶 嘉興府志錦帶河傍植錦帶花多題詠

金雀 嘉興府志一名飛來鳳鹽浸可以點茶

蓮 嘉興府圖記祥符蕩芟荷甚饒弘治嘉興府志

嘉善縣蓮花涇多植蓮花

千葉蓮 正德崇德志錢林村證聖院前有池種千

葉蓮

野蓮 續澈水志 永安湖中央有土方數畝高出如
臺產紅白蓮蘋花芡實類皆野生

木芙蓉 嘉興府圖記 芙蓉洲在青鎮秋光漸老芙
蓉盛開風景襲人殊為佳致

蘆 弘治嘉興府志 嘉善縣蘆墟塘多產蘆葦海鹽
縣圖經 邑中諸湖惟鷓鴣湖與賁湖為大橫湖長
湖上谷湖差小岸曲彌望生荻葦深秋白花雪映

水色蕭遠

竹 萬歷嘉善縣志竹十有二種一曰淡竹其葉入藥
性涼二曰水筍竹言其韌也三曰護居竹葉大陰
濃亦名哺雞言其筍如雞卵之多四曰燕竹燕來
時筍生五曰斑竹稱湘妃竹以其斑如淚痕也六
曰紫竹可為笛簫其粗者為傘柄之用初解籜色
猶青到冬色乃變七曰慈竹又名慈孝竹其筍一
年兩生冬則外生夏則內生有子母相顧之義八

曰王莽竹最大二十餘節後方生枝葉近根有一錢痕俗傳其根堅猛諸竹莫能當故以莽比之九曰黃菰竹一作黃籬節目疎平皮黃力韌為篾器最良十曰石竹其中實而不虛十一曰黃金間碧玉逐節青黃相間筍最遲十二曰鳳尾竹以其形似也

水竹 嘉興府志竹生於水高不盈尺可供盆玩
筆竹 弘治嘉興府志竹類有筆竹

茶 貝瓊遊山記鷹窠山嶄然中高旁殺樹皆合抱
產茶類武夷

酒 名酒記秀州月波酒談薈秀州酒有清若空

蓮花白 正德嘉善縣志臘月以麴釀秫作酒煮而
藏之曰煮酒其隨時而釀者曰蓮花白

三白 萬歷秀水縣志以白麴為之不入草藥露透
無麴氣白米白水故名三白

鹽 太平寰宇記海濱廣斥鹽田相望即海鹽與鹽

官之地同也弘治海鹽縣志本邑僻臨大海斥鹵

之民率多煮海為鹽

見只編凡煮鹽俗曰趁海一則謂趁潮可澆一則謂趁天

晴可曬也趁海先佃海場場一丁其橫九弓長倍之開潭貯潮鑿溝築塍為界分場為上中下三節近海為下場以潮水時浸不易乘日曬也其中為中場以潮至即退夏秋皆恒受日易成鹽也遠於海為上場潮小至所不及必擔水灑灌方可曬也凡潮汛上半月以十三日為起水至十八日止下半月以二十七日為起水初二日止潮各以此六日大滿故當潮大三場皆沒自初二十八日已後潮勢日減先曬上場次曬中場最後下場故上中每月得曬二場下場或僅得其一也凡曬鹽俗曰曬灰言其土之細如灰也侵曉先合力用削刀削灰使鬆隨以碌扒碌碎更用篠竿攪使極細極平

方擔潭中海水以木瓢灑潑如雨使之勻透曬至
哺時仍以削刀收邊用板推夾灰成一長埂以防
夜雨明早仍用翻扒推埂使平更用碌扒碌之篠
竿潑水夾板推聚如前盛夏二日或三日秋冬四
日曬力方足冬則西北風尤勝日曬也先此周築
土圈如櫃長八九尺濶五六尺高二尺深三尺名
曰溜溜傍即開一井深八尺溜底用短木數段平
鋪木上更鋪細竹數十根復覆之以柴冒以草灰
然後取場灰填實溜中用足踏實再以稻草覆灰
仍挑潭中海水多潑草上使緩緩潛滲入井中成
鹹滷可汲煎矣大約一溜之滷可得二十餘擔滷
之上者視水百觔加重觔三十上滷沉下次漸在
上以石蓮子最重者一粒次重一粒又次重一粒
擲滷中驗之上滷則最重者浮否則最重者沉次
重者浮也煎法用大鏊二具中鏊一具中鏊遠於
火停頓冷滷使熱逐漸添入大鏊取惜薪也俗呼

滷二大鑊為一盪用滷六擔可得鹽百四十觔云
大較鹽之盈縮繫乎雨暘貴賤視乎薪價晴久得
鹽多雨久得鹽少薪貴鹽價貴薪賤鹽價賤必然
之數矣削刀長一尺五寸濶二寸一面口薄如刀
用方木一塊鑿口含刀木上著六尺竹柄用以削
泥碌扒頭長二尺著齒十四柄長六尺用以碌泥
條竿用細石竹為之夾扒用杉木板長七尺濶一
尺裝一木鐮子一人用力持鐮一人用繩捉夾使
成灰埂木瓢用以挹滷弔子用竹
為柄以汲滷大鐵鏟用以鏟鹽鑊
謹按嘉屬產鹽最廣如西路鮑郎等場其色多白
海沙蘆漚等場其色多青青者粒麤且凝成水塊
其味最鹹吳郡造醬者多
利此取其質重而味厚也

藥草
嘉興府志補藥品有蒲公英旱蓮艾火炊草

夏枯草 歲茹草

仙茅 海藥本草仙茅生西域今浙西諸州亦有之
葉青如茅而軟有縱文又似初生椶櫚春初乃生
三月有花如梔子其根獨莖而直大如小指八月
采根曝乾以為藥

龍骨 嘉興府志秀水縣穆溪通太湖水中多龍骨
俗傳龍蛻於此

甘菊 萬歷嘉善縣志花黃梗紫為甘菊最良野菊

叢生花小性涼家菊修摘花大氣弗聚矣

紫蘇 至元嘉禾志海鹽出者佳

枸杞 石門縣志方書云出崇邑牢牆上者佳今絕

少

馬兜鈴 圖經本草浙西皆有之生苗作蔓繞樹而

生

蓬莪茂 圖經本草浙西或有之三月生苗在田野

中其莖如錢大高二三尺葉青白色頗類蘘荷

燈草 嘉興府志其皮可以織簾

翠雲草 嘉興府志生陰地翠色可愛

茜草 名勝志嘉善縣茜溪出茜草故名

藍草 萬歷嘉善縣志本縣遷南胥五高鄉種藍呼
為澱染草也

馬蘭頭 嘉興府志可作菜食花如小菊

紫荷花 朱彝尊鴛鴦湖擢歌注草生田中花開如

茵可坐臥遊人每藉此泥飲

嘉興府志又名孩兒
草田家時以壅田

菖蒲 嘉興府志嘉善縣東西菖蒲涇多產菖蒲

鶴 明一統志鶴湖在嘉善縣其中多蘆葦或以舊

嘗產鶴故名

天啟平湖縣志鶴本產此今多來自他所

青鵪 萬歷嘉善縣志生北鄉湖蕩中頗肥俗言水

裏鰓岸上鵪

鴛鴦 名勝志宋聞人滋南湖紀畧云攜李東南皆

陂湖而南湖尤大其禽多鴛鴦故名鴛湖

鷗 萬歷嘉興府志小鳥色白在湖蕩中隨波上下

常以三月風至乃還洲嶼

錦鳧 貝瓊遊山記及山下有三湖青停黛蓄與天

一色錦鳧往來可畫

黃雀 乍浦九山補志雅山之北有紫蕩皆黃茅白

葦秋間黃雀不知其何來飛集其間至夜深土人

以網張四圍逐得之有二種一名蘆雀味少劣

石門

縣志黃雀出排頭者蠟塗軟脚為勝朱彝尊駕鸞為湖擢歌注黃雀味甚腴產陶莊馬嘯吳地記云海

邊小魚所化

秋鳥 乍浦九山補志秋鳥亦非山產八月中乘西
北風起迎風而來此鳥成羣飛每下土人網取之
凡山林園囿樹木茂盛處百十為羣一網可得兩
隻者名畫鵲雄名青鵲雌名雌搏四隻者名花鷄
八隻者名鑽籬至春時又復回至山間復網之名
回春味頗劣惟秋鳥價頗貴餽遺者以為珍品
海鹽縣圖經屠墳林木甚茂秋月多東南風時有鳥大
如鳩者忽乘風來集信宿向內地分飛至春又復
集此渡海歸味極腴美為時饌雅貴名曰秋鳥
初來時剝其腹有青胡椒因驗是日本來也

菜鷄 嘉興府志青色似青鷗又一種名鵪鶉皆田間食穀之鳥人捕食之

紫山看火 朱彝尊駕鵞湖棹歌注鳥名鳴則桑葉貴

透倉鳥 舊浙江通志出嘉興俗名十姊妹籠其一則羣皆來

鴨 樂府阿子歌注嘉興人養鴨兒因作此歌

鴨餛飩 方回竹枝詩秀州門外鴨餛飩朱彝尊鴨

餽餽詩注鄉人目曰喜彈

朱彝尊賦鴨餽餽詩禾俗養鴨兒樂府歌阿子

一雄挾五雌累百啞長水方春穀將出生意不可
止要術啄范宜匝月雛定起淺夫計欲速火攻迭
運徙半體形已呈忽焉混沌死他邦盡棄擲吾黨
獨見喜餽童肩椒挂竈妾洗毛髓色清黃白斑候
飲漿汁滓鴨簽晒東京鴨刪屏南史既免治刀砧
兼弗齟牙齒以之號餽餽莫審所自始得非飲食
人桐江方萬里記取秀州門竹杖扶入市至今七
十坊饌法傳伍氏物微愛贈殊留賓姑舍是二子下
箸貪謂足勝羊豕作詩賞逸味虛谷同一揆不知
天地間何者真好美試問厨烟生曾否動食指

牛 嘉興府志本地惟牛最貴

豬 萬歷嘉善縣志正德中禁天下養豬一時埋棄

俱盡本邑下保民陳氏穴地養之遂傳其種

獺 萬歷嘉善縣志他處獺祭魚則四方陳之避而弗食惟本縣近河多小廟獺必進魚於廟祭之

金魚 名勝志秀水縣月波樓下為金魚池唐刺史

丁延贊得金鯽於此後為放生池方輿勝覽云在

城外吳陸瑁池即今之南湖也

陸蒙老金魚池詩池上春風動白蘋

池邊清淺見金鱗新波已縱遊魚樂調笑江頭結網人

鯽魚 天啟平湖縣志烏背者佳出本縣塔院南

刀鱗 朱彝尊駕鵞湖掇歌注鱗亦作鯨春初肥美
白魚 萬歷嘉善縣志葉氏避暑錄云太湖白魚實
魁天下今本縣到處有之但來有定期必成羣而
過

異色魚 朱彝尊駕鵞湖掇歌注隱真院在城東昔
有方士於此修煉化去中有一池生魚多異色

銀魚 萬歷嘉善縣志色白如銀大者如箸細者如
鍼北鄉蕩中有之

斑魚 萬歷嘉善縣志似河豚而小怒則腹脹如鼓
色斑有點味亦美肺尤佳前人有詩云忽憶夏湖
風味美斑魚黃雀寄來無

黃魚 天啟平湖縣志本縣例該歲進黃魚三百尾
每年僉役解貢嘉靖三十年糧長與蘇州水厰相
爭訴狀遂免魚貢

河鮑 天啟平湖縣志鮑魚即河鮑湖中間亦網得
薰鮑 嘉興府志補食之品有薰鮑

海族 海鹽縣圖經鱗之品有黃魚鰲魚鱸魚鮠魚

鱖魚魴魚鰻魚鰱魚梅魚鯖魚鯾魚馬臯魚比目

魚河魴魚青蝦白蝦黃蝦海蝦及水母介之品有

蟹蟮蚌白蟹螭蜎瑟蟹螳白蜆白蛤黃蛤土蚨

見只

編海上業捕魚者約二百家名魚戶戶納魚課始
得捕捕之法有罾有關網有石斷有退策及鈎罾
等法遠捕用舩近捕用簞並櫓搖櫓亦能破浪行
也簞以大竹貫疊以篾絞草扎縛成之罾亦網類
口濶二丈口周方緣著四竹先以大木穿竹索捷
入海底二丈許索浮海面必長八丈方足繫罾與
潮極滿之勢等潮至口東向退又西向隨潮迎去
受魚最多張罾近者得魚少必遠置乍浦關牛山

東大海中此山洋水至深水族所聚魚船日乘潮
一往謂之撈羅關牛之羅以十月始張六月乃撤
海物著網即死夏秋道遠多臭腐不可市耳惟近
海羅所得魚鮮好足趁人口四時不撤矣又有草
羅但以草繩結羅張近處用捕海月關網以竹綴
網簽著淺水處高四尺餘長百丈空其一面潮至
網沒潮退截水得魚也石斷疊石如城高丈許為
費頗多大小惟人力是視所謂扈也得魚因潮猶
之關網斷多在泰山左右惟關網在近郭三四里
間家戶買鮮必問關斷則又勝於近海之羅矣取
近羅之魚用簞退簞用竹織成口大底尖長二三
尺千百連帶以竹插置塗泥上惟鯿魚嗜泥自入
簞中尤多鈎用雙鬚者長三尺許以鈎蛭墾用鈎
鎔沙虎穴最深須田家大四齒鐵鎔蛭與蛤蚬黃
蛤用小四齒鎔大較海物亦按時見美如正月則
貴河鮑往時人罕食者漁人得此棄不顧今則珍

為名饌價亦增貴蜆生沙塗中殼如蛤而薄惟春
月肉圓肥無沙梅魚長不過五寸類小黃魚然別
是一種也二月鱗魚長尺餘有子者佳稍不及江
產鮮蛤一云黃蛤形小味鮮入土甚深鑿得捷捉
遲即縮入泥中至六月便不可食三月板魚扁薄
類板一名箸鰈四月鮑魚馬臯魚二魚皆無鱗鮮
而易潰馬臯多烘以為腊貯罌餉遠此時白蝦以
朱腦菊花心見搗蓋子在腹間如黃栗然用椒酒
烹口咋肉脫名酒發蝦五月黃魚雖盛自從洋山
網捕鹽則不能多得鯊魚犁頭燕尾有翅無鱗周
身裹沙齒鋒利得魚必向空戲擲而後食常有噬
人一髀一足去者土人罵篲戶曰鯊魚殘最所啣
恨此魚入石斷乃為人所捕又有虎頭鯊身黑尾
尖得之惟堪炙油不中食蓋即江豚類矣鰻魚圓
大如箕腥而骨嫩尾長端有鋸刺人以手捉能運
尾擊之口刺毒腐至骨乃已至鰻魚最稱上品但

一二見不能與江產爭多六月黃甲即蝤蛄兩螯極大得即緊縛蒸食美緩縱則介裹腥水較讓明州殼中黃實也鰕魚啗雄白殊勝腹子者鰭魚鼻與身等帶甲愈佳而脆美黃膩不減婁東晚城七月白蟹形似蝤蛄稍白食泥而肥海螯身圓白頭戴壘塊而赤浮水蠕動得之易而且多質成於水乾之正復無幾八月青蝦隻有重三四兩者漁者腊之曰對蝦凡蝦自四月至此為盛人家烘貯以飭盤案又銀魚細短不若產於河者九月土蛛自八月至此月不復食泥吐白脂晶瑩塗土比他月稍佳貧兒手拾盈桶不過三四錢十月沙虎即蟊蛸一類獨深居沙土約一二尺故殼軟而肥然蟊蛸得不易至貿錢隻四五也惟蟊蛸雖穴處而散出聽人攪拾十一月蛤蛸亦墾沙而取肥大少遜通川蛸處深穴故必鉤取以大者為美十二月鱸魚狀與鰕相似味不大佳若四時皆有莫若鰻魚蛇

頭鮮身味甘骨鬆俗稱海蕉子最細美熏制薄切
明如琥珀片比明海雜著他子散細腥黃美惡自
判也他如鰻魚亦時時有大者與鯊鮪二種有重
百觔者又比目與箸鯪彷彿不見貴重惟海鰻肥
者可角河鰻其他若孺魚之軟爛瑟蟹之細碎封
皮魚之瘠薄蝦塗之作醬蟹之多殼皆下品不足
言也大都蟹蛤蜊蚶月滿漸瘦月黑乃肥介屬陰
類隨月之暗體為消長耳又水族雖逐時見珍然
春夏秋三時種種各具但冬春之際
多食泥率皆色黑腴減不中盤餐也

蟹 正德嘉善縣志汾湖半屬吳江一名分湖周二

十餘里中產蟹紫螯殊美

陶振汾湖賦紫蟹剖吳
下之膏腴注各處蟹皆

白須惟汾
湖紫須

蝦 名勝志嘉善縣祥符蕩中產巨蝦

螺 明一統志螺潭在府城南相傳有白色細螺生

其中嘉興府圖記范蠡湖有西施粧臺池產異螺

陰雨輒舒五采

張堯同范蠡湖詩少伯曾居此螺紋吐綵絲一奩秋鏡好猶可照西

施

牡礪 萬歷嘉善縣志北鄉湖蕩多蠣其首向左者

為牡礪

沙虎 乍浦九山補志產高山南不甚大與蟳蜍

等糟食甚美又呼為沙狗

海蜃 爾雅翼蛇一名水母又曰鮐魚又名桴蒲魚今

浙西通呼蝦蛇又名海靱俗云潮之來也蛇隨之而

來羣蝦擁之若竹槎然槎者障塞之名潮退則蝦棄

之陸故為人所獲或曰在海中不淨海神惡焉驅與

人食之

天啟平湖縣志一名海月俗呼海蜃

蠶 萬歷秀水縣志三月蠶婦浴種及桑齊養蠶謂

之蠶月三眠作繭繅絲次為綿諺云江村四月間

人少纔了蠶桑又插秧

海鹽縣圖經蠶之初收也以衣衾覆之晝夜程其寒

煖之節不使有過過則有傷是為護種其初生也則以挑葉火炙之散其上候其蠕蠕而動澾澾而食然後以鵝羽拂之是為撥烏其既食也乃熾炭於筐下并其四周剉桑葉如縷者而謹食之又上下抽番晝夜巡視火不可烈葉不可缺火烈而葉缺則蠶餓而傷火致病之源也然又不可太緩緩則有漫漶不齊之患矣編經曰蠶薦用以圍火恐其氣之散也束桔曰葉墩用以承刀惡其聲之著也是為看火食三四日而眠眠則擣眠一二日而起起則餒是為初眠自初而之二自二而之三其法盡同而用力益勞為務益廣是為出火蓋自此蠶離於火而葉不資於刀矣又四五日為大起大起則難難則分箔難早則足傷而絲不光瑩難遲則氣蒸而蠶多濕疾又六七日為熟巧為登簇巧

以葉蓋曰貼巧驗其猶食者也簇以藁覆曰冒山濟其不及者也風雨而寒則貯火其下曰炙山晴暖則否三日而闔戶曰亮山五日而去藉曰除托七日而採覲為落山矣每蠶忙時有小鳥連叫曰撒山看火蠶室用火育者倦極常患失火鳥蓋警之也山者用柴帚以禾草為之長尺有咫大可一握散布登蠶其上有至二三重者凡蠶之性喜溫和惡寒熱太寒則悶而加火太熱則疏而受風蠶房宜卑卑則溫蠶簇宜高高則爽又其收穫時須在清明後穀雨前大起須在立夏前過此不宜也至於桑葉尤宜乾而忌濕少則布挹之多則箔晞之能節其寒暖時其饑飽調其氣息常使先不踰時後不失期而舉得其宜故所收率倍常數時謂得養蠶術焉

促織 朱彝尊駕鴛鴦湖掇歌注嚴將軍墓前每年產

一促織為冠里人爭取之佳者名為紫金翅

嘉錦 嘉興府志嘉興出錦名嘉錦

雲絹 嘉靖浙江通志嘉興出

畫絹 杜氏畫譜密機絹極勻淨出魏塘趙子昂多

用此作畫

濮院紬 桐鄉縣志花紡紬出濮院名色甚多遍行

天下

謹按嘉錦之名頗著而實不稱惟濮院所產紡紬與西機綾練絲熟淨組織亦工是以濮院一鎮之

內坐賈持衡行商廣至終歲貿易不下數十萬金居民藉此為利蓋由勤以致之也

杜紗 萬歷嘉善縣志出縣思四等區隨用染色但比官紗可浣濯至於綿紗窮民無本不能成布日賣紗數兩以給食故諺云買不盡松江布收不盡魏塘紗

桐鄉絹布 桐鄉縣志邑人工於紡織絹有花素官絹籬筐絹素絹帳絹畫絹綾有花綾錦綾素綾羅有三梭五梭花羅素羅紗有花紗腳踏紗縐紗布

有龍潭布桐鄉布眉公布麻布陡門布建莊布烏鎮布窰布苧布

綿紬 桐鄉縣志出青鎮

細布 天啟平湖縣志靈溪水秀沙明產細布人爭市之

木棉紗布 萬歷嘉善縣志木棉本出閩廣宋時始

傳種種於松江之烏泥涇今南鄉高田種之

湧幢小品

地產木棉花甚少而紡之為紗織之為布者家戶習為恒業不止鄉落雖城中亦然往往商賈從旁

郡販綿花列肆吾土小民以紡織所成或紗或布
侵晨入市易綿花以歸仍治而紡織之明旦復持
以易無頃刻間紡者日可得紗四五兩織者日成
布一疋難脂夜作男婦或通宵不寐田家收穫輸
官償債外卒歲室廬已空其衣食全賴此激浦俗
善績苧更以織苧布為業然地實不產苧市之他
方布亦不大精
非貴人所御也

香 嘉興府志補有合香帶梅花笑蘭衣香

薔薇露 朱彝尊駕鵞湖擢歌注蠶月最多野薔薇

開白花田家籬落間處處有之蒸成香露可以澤

髮

墨 春渚紀聞沈珪禾人善製墨諺云沈珪對膠十年如石

髹器 輟耕錄嘉善斜塘楊滙髹工鎗金鎗銀法以

黑漆為地鉞刻山水樹石花竹翎毛亭臺屋宇人

物調雌黃韶粉以金銀箔傅之

春明退朝錄綠髹器始於王冀公家

祥符天禧中每為會即盛陳之然製自江南頗質朴慶歷後浙中始造盛行於時

銅器 嘉興府志補貨之品有走金銅器商嵌銅器

郡中者佳

銅爐 朱彝尊駕鵞湖擢歌注里有張鳴岐製銅為薰爐聞於時

銀槎 輟耕錄浙西銀工之精於手藝者朱碧山在

嘉興魏塘

朱彝尊駕鵞湖擢歌注朱碧山所製銀槎鑿張鵞於上以七寶嵌之

錫壺 朱彝尊駕鵞湖擢歌注里中黃元吉冶錫為

壺極精緻

匏杯 秀水縣志邑人周五峯製近日鄉人多用之

曹溶匏杯歌郡中攻匏始王氏其後模倣紛然多各能推擇尚堅樸八月九月留霜柯宣武平生誦

形似精微以往皆清訛石佛羣僧稱好手工惟急就虧措磨流傳空復遍燕粵賤售只辱幽人過東郊周生最晚出家無尺帛顏常酤思窮莽蒼得奇竅盡刷怪詭還中和終年黠慘與神遇歛起奏月如擲梭不規而成妙天質因物纖巨無偏頗餅壘滿眼總適用譬若聖教陳四科其間卓絕首觴器琴軒書榻光相摩捧之宜俟倨佺輩傍坐可斥妖秦娥愚也好古徹骨髓周生之寶曾經過持贈不惜倒筐篋皜若片月來烟蘿南瀋閩埂北沙塞塵坭戛擊催沉疴糟丘已隕謝歡伯不飲奈此飽者何

銅 漢書食貨志吳東有海鹽章山之銅

鐵 海鹽縣圖經雅山本產鐵烹冶者以不當爐鞴

費幸免傷鑿

黃石 海鹽縣圖經豐山產石色黃而堅土人採為

甃築用

磚瓦 萬歷嘉善縣志出張涇窯者曰東窯出千家

窯者曰北窯東窯土高窯大火足故堅完可用北
窯地卑取土他所又窯小悶熟者故脆而易壞

陶甃 弘治嘉興府志嘉善縣甃竈塘居民以陶冶
為業

湖州府

稻 弘治湖州府志稻之類八月白稻八月熟一名
鯉花紅一名觀音稻一名瓜熟稻趕冬春稻言其
早熟可接陳米雁來枯稻雁來時即枯綻來烏稻
其色初白至熟即烏三穗千稻其穗長一穗三百
餘粒泰州種自泰州來其米紅色下馬看稻其色
齊熟言其好看也野雉斑稻色如雉雞之斑爛麻
子烏稻米粒如麻子而色烏鵝脚黃稻色如鵝掌老

赤鬚稻至熟時芒赤師姑梗稻言其無芒黃梗鮮
稻其梗黃胭脂糯稻其色紅羊鬚糯稻芒長而白
其稻早熟即早糯也馬鬃糯稻芒如馬鬃而色赤
懶曬糯稻色易變不曬而變也烏香糯稻色烏而
香鐵梗糯稻其梗硬而不倒趕陳糯稻早糯也泥
裏變糯稻其米不待曬而變長興縣志稻屬有宜
興白宣州白七月白三朝齊鵝子黃戲塘青武康
縣志有大黃稻小白稻紅桂晚稻金裹銀稻

吳興掌故

湖耕深而種稀其土力本饒沃種不稀者至秋多病蟲嘗見老僧言吾田先用人耕繼用牛耕大率深至八寸故倍收又湖之老農言下糞不可太早太早而後力不接交秋多縮而不秀初種時必以河泥作底其力雖慢而長伏暑時稍下灰或菜餅其力亦慢而不迅疾立秋後交處暑始下大肥其力倍而穗長矣

旱稻 崇禎烏程縣志即占城稻自宋真宗取於福

建者湖人因有占米之稱名曰旱稻

吳興掌故山中往往旱荒

乞得旱稻種耐旱而繁實且可久蓄高原種之歲歲足食種法大率如種麥治地畢豫浸一宿然後打潭下子用稻草灰和水澆之每鋤草一次澆糞水一次至於三即秀矣

黃龍稻 崇禎烏程縣志郡大水陳郡侯幼學訪有
黃龍稻可播購求以濟潘士達詩云相傳白鳥能
招水却道黃龍可濟民

麥 弘治湖州府志大麥即麩麥也早熟而粒大小
麥有赤白二色又有無芒者名火燒頭麥即落麥
也 穠麥粒如大麥即穠麥也

菜 弘治湖州府志大頭菜其頭白甘軟可食亦宜
醃藏禦冬脆嫩味佳西吳里語湖州白菜出郡城

東門外者嫩白甚佳移種他處則為青菜油菜其

品味變矣與郡之溪中鰻魚同稱謂之大頭菜小

頭魚

萬歷湖州府志長興有組中山蒞醢藏菜也昔吳王於山中種蔬為軍人冬食之備西吳

枝乘吳興槎頭鰻為海內佳味東門外之蒟蒻與之齊名土人稱大頭菜小頭魚云

謹按湖地宜菜四時皆有冬春為市而冬月尤多聞之諺云冬月菜莖小雪小行大雪大行冬至不行今則竟有三熟直至臘盡青

青滿畦湖民資其利者溥矣

烏菰菜 弘治湖州府志青菜亦名烏菰菜春間煮

曬為乾蔬

薺菜 吳興掌故湖人不甚食薺薺和肝氣明目夜則血歸於肝肝氣和則血脈流通津液暢潤東坡與徐十三薺羹書以為天然之珍雖不甘於五味而有味外之美天生此物以為幽人山居之祿

蘿蔔 崇禎烏程縣志一名蘆菔一名蔓菁春末生者謂之楊花蘿蔔形細長夏生者為夏菰蘿蔔形圓秋生者為秋菰蘿蔔形長而大俱出太湖旁諺云太湖蘿蔔賽過金壇藕

蔓菁 吳興掌故蔓菁根能濟饑若蘿服止主消食
蔓菁莖苗可作菜子可作油諸葛種之蜀中有自
也

謹按本草諸書蘿蔔與蔓菁皆並載是屬
二物烏程志謂蘿蔔一名蔓菁者誤也

生瓜 弘治湖州府志嘗瓜一名生瓜可糟醃出太
湖傍

山藥 吳興掌故山藥本名薯蕷以山土所宜故名
山藥然黑土不如黃沙土平地種者無益予以供

早旦下食兼作東坡玉糝羹及作酒方在本草

薑 蔬譜出太湖傍者枝紅

茄 吳興掌故湖中諸佳蔬易辨而美惟茄不如松江之肥大其餘皆可以養老省擊鮮也

葱 蔬譜出太湖傍者為湖葱頭白而長

筍 萬歷湖州府志筍出棲賢山者佳

崇禎烏程縣志棲賢康山

之間專種猫竹筍有重至二三十觔者其種法稀留竹本每年鋤二次並無草根清明前後見地有氣眼即知下有大筍用力掘出其白如玉立夏後漸無剛竹筍夏出邊筍秋出團筍冬出吳興掌故

筍亦有毒須用薑或茱萸醬制之一說滑利大腸而益於肺謂之刮腸筍一云竹實少陽之氣而尅土脾

筍脯 筍譜天目山生筍其色黃今人以天目筍脯

見饋其色綠少有黃者聞其煮法旋湯使急轉下筍再不犯器即綠矣

酸筍 吳興掌故深山梅溪以上皆荒山筍然路遠不能及時遠致作筍藟賣之極軟滑可供盤殮名

酸筍

山家清供嘗見山僧作筍粥幽尚可愛其煮筍用大塊云薄則味脫大塊久煮其味自全

蓴 太平寰宇記長興縣西湖一名吳城湖湖中出

佳蓴嘗貢弘治湖州府志莖葉如小荇但莖上有

水涎滑澤可食出烏程蘇灣者佳

吳興掌故湖中多蓴鎬孟希云

永興湘湖蓴菜三月盡採賣至秋則無人採矣孟希此語止一方之見耳春蓴如亂髮成本此則猶常菜不足異秋蓴長丈許中止一二尺生冰甚滑一二尺外皆棄物且春蓴嫩不可作羹秋風之思在此一二尺間耳以菜體計之宜永興之不知採也

蓴 吳興掌故湖中大旱乏食采茵蓴食之山人云

凡色大紅及黑白色者俱不可食惟淡紅色者無

毒葢蕈受濕熱之氣謹疾者宜詳之兩河初夏生
麻菰即蕈也極大者亦不可食惟種出者無毒種
以爛楮木數寸碎之埋土中以米泔灌即生

石耳 名勝志安吉州梅溪石門中產石耳食之止
熱

蕨粉 吳興掌故湖中採蕨其苗曰蕨箕春初可作
菜其根深者至三四尺每根二觔搗取粉水澄細
者可充一夫一日之食自九月至二月可採至三

月穿芽則根虛不可食可救半年荒也

桑 湧幢小品湖州畜蠶者多自栽桑否則租別姓之桑俗曰抄桑凡蠶一觔用葉百六十觔諺云仙

人難斷葉價故栽與抄為最穩否則謂之看空頭

蠶有天幸者往往趣之

吳興掌故蠶桑之利莫盛於湖大約良地一畝可得

葉八十箇計其一歲墾鋤壅培之費大約不過二兩而其利倍之自看蠶之利復稍加贏而其勞固已甚矣俗呼小錄湖州以桑葉二十觔為一箇

櫛 述異記顧渚山有櫛子樹其木如玉色渚人採

之以為杖

桐柳 吳興記烏程縣南百里有桐墟百五十里有柳墟又有柳湖

楓櫟 太平寰宇記長興縣飛雲山多產楓櫟檀 萬歷湖州府志生罨畫溪旁有連理枝者

苔梅 梅譜苔梅惟吳興有之他雖花盛開苔皆剝

落惟自武康即不變移

吳興掌故其枝虬曲萬狀蒼蘇鱗皴封滿花身又有

苔鬚垂於枝間或長數寸風至綠絲飄飄可玩初謂古木久歷風日致然詳考所產雖小株亦有苔

痕益別是一種予從會稽移植十本一年後花雖盛苔皆剝落殆盡惟湖之武康所得者即不變此風土使然會稽隔一江湖蘇接壤土宜亦異則同也馮子振苔梅詩姑射仙人翳翠鸞濛濛香霧濕飛翰夜深舞罷霓裳落留得葱裾護曉寒

消梅

弘治湖州府志出道場山下青脆殊甚其實

尤早

烏梅

嘉靖浙江通志湖州出

吳興掌故安吉之梅溪以梅得名而烏梅

特為名產他方所製取自殘

落安吉特摘完好者為之

楊梅

元豐九域志長興縣石擲山生楊梅慎蒙遊

黃龍洞記自府城出北門至弁山之下楊梅樹以

數萬計青翠滿林不減閩之荔枝自是沃壤又一

奇觀也

羣芳譜吳中楊梅種類甚多名大葉者最早熟味甚佳次則卞山本出苕溪移植光

福山中尤勝西吳枝乘果實芰藕菱芡皆佳而楊梅殊絕出太子灣者大幾如卵甘不勝口

櫻桃 成化湖州府志一名含桃出道場山下者最

佳

木瓜 太平寰宇記吳興土產木瓜摻煎重抗子長

興縣志木瓜出長興者其實大

牛嶽四安道中所見詩木瓜已過折

山來黃帕封林未敢開想見白沙紅照裏繡紋磊
落見奇瑰注木瓜園入折山數里供進後方敢賣
土人取瓜埋其半於沙中以紙鏤
花貼上以溪水灑之日曬乃紅

梨 弘治湖州府志出安吉名金花梨佳

栗 萬歷湖州府志出安吉孝豐

橘 避暑錄話惟洞庭山最盛近處好事者園圃移
植之橘比田利數倍而培治之功亦數倍於田橘
下之土幾於用篩不使見纖草地必面南為層級
次第使受日每歲大寒則於上風焚糞壤以溫之

橙 崇禎烏程縣志味酸極香用糖製成小餅或用
鹽配桂花入茶香緣亦可切片糖製

西瓜 崇禎烏程縣志出太湖傍地不若常州來者
今山地有沙瓜亦佳

藕 崇禎烏程縣志出桑瀆者佳以紅荷蓮白荷藕
為貴花紅者蓮腴而藕硬花白者蓮嫩而藕甜

風菱 崇禎烏程縣志出菱湖秋晚採入竹箔曝乾

為風菱

弘治湖州府志菱湖人焙乾
食之可療饑謂之曰菱米

洛如花 就印錄吳興山中有一樹類竹而有實似
莢狀鄉人見之以問陸澄澄曰名洛如花郡有文
士則生

珠藤 太平寰宇記長興縣紫花澗生珠藤至三月
紫花滿澗

重臺蓮 平泉草木記其水物之美者有白蘋洲之

重臺蓮 太平寰宇記白蘋洲舊有千葉蓮

李德裕
重臺芙蓉

芙蓉賦并序吳興郡南白蘋亭有重臺芙蓉本生於
長城章后舊居之側移植蘋洲至今滋茂余頃歲

徙根於金陵桂亭奇秀芬芳非世間之物因為此
賦以代美人託意焉昔柳惲為吳興太守顧座客
而嘆曰遊汀洲以採蘋憶瀟湘之故人見白日之
已晚惜青春之不返且欲捨瓊藥於桂山折瑤華
於蘭畹客乃稱曰彼有清川爰生瑞蓮紅葩煒而
畢畢翠葉小而田田願得薦佳名於君子悅麗色
於當年於是縱蘭棹泛淪漣吟朱鷺於遼管鳴鵲
雞於瑟絃臨漪瀾以遠望嘆華艷之何鮮是日際
海澄廓微風不起涵麗景於碧湍爛朝霞於清沚
鮮膚秀穎攢立叢倚疑西子之顏配自館娃而戾
止遂以意之若珠闕玲瓏疊映崑峯聚玉女之光
色抗霓旌以相從迫而察之若桂裳重複鬱撓丹
谷思江妃之窈窕發紅羅之芬郁爾其映蘭芷出
蘋萍掩萋萋之衆色挺嫋嫋之修莖泣清露以濯
秀流鮮飈而發精雖草木之無情亦獨立而傾城
若乃行潦既收秋光始靜見涼野之夕陰悵回塘

之餘景思摘芳以贈遠更臨流而引領翡翠失其
輝鮮珠璣奪其光穎惟斯物之特麗宜獨秀於寥
天在靈境而何降居下澤而何偏有繁華而不實
嗟淑類而莫傳念莊姜之無子非巧笑之未妍彼
天意之所屬諒難得而知焉乃為歌曰吳山秀兮
烟景媚因淑女兮感斯瑞蓮雖多兮無厭類蘭徒
芳兮何足貴人已去兮代一
不留獨含情兮託茲地

五花蓮

咸淳臨安志淳熙中孝宗同太上至德壽

宮冷泉堂時蓮花盛開太上指池心云此種五花

同幹近伯圭自湖州進來前此未見也

蘆方輿勝覽苕溪兩岸多生蘆葦秋時則花

荻 名勝志荻塘產荻花最茂

白蘋 吳興志白蘋洲乃越女采蘋處梁柳惲為吳

興守賦汀洲采白蘋詩即此

筴竹

弘治湖州府志其篾柔韌可為器用

避暑錄話筴竹

色深而葉密始得此山即散植竹畧有三四十竿
雜衆色有之數年後所向皆竹矣有告予種竹法
者但取大竹善掘其鞭無使殘折從根斷取其三
節就竹林燒其斷處使無泄氣種之一年即發細
筴掘去勿存次年出筴便可及母插柳者燒其上
一頭則抽條倍長鬻牡丹者燒其柄或蠟封即不
蒿蓋一術也種竹須當五六月世言五月
十三為竹醉日不必此日凡夏皆可種也

箬竹 崇禎烏程縣志其葉大可編蓬

徑尺竹 竹譜可為甌出湖州

箭箬 太平寰宇記長興縣箬溪夾溪悉生箭箬

苻茶 經吳興記烏程縣有溫山出御苻

顧渚茶 茶經浙西茶以湖州為上太平寰宇記長

興縣金沙泉每歲造茶所也茶產在邑界有生顧

渚中者與峽州光州同生山桑儒師二塢白茆山

懸脚山嶺者與襄荊申三州同生雁亭山伏翼澗

飛雲曲水二寺青峴啄木二嶺者與壽州同天中
記明月峽在顧渚側二山相對石壁峭立大澗中
流茶生其間尤為絕品張文規所謂明月峽中茶
始生是也國史補唐時以宜興造數多命長興均

貢限清明日到京謂之急程茶

避暑錄話顧渚在長興縣所謂吉祥

寺也其半為今劉侍郎希范家所有兩地所產歲
止五六觔余求於劉氏過半觔則不復佳蓋茶味
猜者在嫩取其初萌如雀舌者謂之槍梢敷而葉
者謂之旗旗非所貴不得已取一槍一旗猶可過
是則老茶譜袁州界橋其名甚著不若湖州之研
膏紫筍有綠脚垂下故公淑賦云雲垂綠脚吳興

掌故今茶品已定與唐不同大抵南產優而絕無
用團者紫筍旗牙雀牙之品大著矣陸羽所謂常
州即陽羨也與顧渚故同而湖茶必先顧渚云蔡
寬夫詩詒湖州紫筍入貢每歲以清明日貢到先
薦宗廟後賜近臣其生顧渚在湖常之間以其萌
茁紫而似筍故曰紫筍茶勝說湖州長興縣啄木
嶺金沙泉每歲造茶之所泉處沙中居常無水湖
常二郡太守至於境會亭具犧牲拜勅祭泉其夕
水溢造御茶畢水即微減供堂者畢水已半之太
守造畢即涸矣守咸還旆晚時則有風雷之變杜
牧題茶山詩山實東吳秀茶稱瑞草魁剖符雖俗
吏修貢亦仙才溪盡停蠻擢旗張卓翠苔柳村穿
窈窕松澗渡喧阗等級雲峯峻寬平洞府開拂天
聞笑語特地見樓臺泉嫩黃金湧牙香紫壁裁拜
章期沃日輕騎疾奔雷舞袖嵐侵澗歌聲谷答迴
磬音藏葉鳥雪艷照潭梅好是全家到兼為奉詔

來樹陰香作帳花徑落成堆景物殘三月登臨愴
一盃重遊難自尅俛首入塵埃王十朋謝章季子
惠顧渚茶詩白齒新芽不出山青囊誰遣到人間
午窓驚覺還鄉夢紗帽籠頭捧兔班自注季子以
青囊紗盛二兩乃其顧渚
零陵佩不出山絕品也

峽茶 茶疏長興之羅峽疑即古人顧渚紫筍也介

於山中謂之峽羅氏隱焉故名羅姚伯道云明月
之峽厥有佳茗是名上乘要之採之以時製之盡
法無不佳者其韻致清遠滋味甘香清肺除煩足
稱仙品此自一種也若在顧渚亦有佳者人但以

水口茶名之全與峽別矣

西吳技承湖人於茗不數顧渚而數羅峽然顧

渚之佳者其風味已遠出龍井下峽稍清雋然葉粗而作草氣嘉靖長興縣志羅峽在互通山西土地廟後產茶最佳吳人珍重之凡茶以初出雨前者佳惟羅峽立夏間園梗粗葉厚微有蕭茗之氣還是夏前六七日如雀舌者最不易得然廟後山西向故稱佳總不如洞山南向獨受陽氣專稱仙品只數十畝而已凡茶產平地多受土氣故其質濁羅茗產高山巖石渾是風露清虛之氣故可尚

烏程酒 西吳里語秦有烏氏程氏各善造酒合其

姓為烏程縣烏氏名中程氏名林張景暘七命云

酒則荆南烏程是也名酒記湖州酒碧瀾堂又雪

溪

箬酒 元和郡縣志長城縣箬溪水釀酒最醖稱箬

下酒

吳錄長城箬下酒出箬溪南曰上箬北曰下箬村人取水以釀酒醇美勝雲陽吳興記下

箬釀

酒尤佳唐劉禹錫詩鸚鵡杯中箬下春白居易詩勞將箬下忘憂物寄與江城愛酒翁

三白酒 西吳枝乘今烏程釀亦寢薄邇來沈氏三

白乃甲江南

崇禎烏程縣志湖人好飲白酒暑月開尊熟或入竹葉或荷葉芳烈而清

名碧香清又有茅柴酒以茅易燎而白酒易醒今造三白酒特勝謂白米白麴白水也

百花春 楊誠齋集有謝湖州太守王誠之送百花

春詩

吳朮 西吳里語孝豐天目山有仙丈峯產吳朮名

雞腿朮藥品特佳

龍膽 本草綱目一名陵游以吳興者為勝根狀如

牛膝其味甚苦

紫苑 太平寰宇記長興縣紫花澗芳蕪中出紫苑

黃精 西吳里語菁山產

成化湖州府志菁山舊傳葛洪種黃精於此至今多

菁 黃

松黃 吳興掌故松之精有三用茯苓松脂與松黃

也松黃酒服之輕身療病與脂苓之功相上下養

老新書松莖去赤皮取嫩白者蜜漬之畧燒令蜜

透勿太熟極香脆

王復吉謝劉司空自呂山寄松英藥餌詩坦林晝永團松蓋弁

壑春英長藥苗寄我遠從丹洞口報君惟有白雲謠

石菖蒲 山家清供吳興多石菖蒲可栽為盆玩

吳興

掌故山澗幽僻處多石菖蒲性幽不可近塵土及烟氣養老新書云夜藥間置一兩盆可以收烟不薰眼此非知蒲性者一經油烟則色暗無光久則泥爛塵土著亦能憔悴天暖常以清泉濯之無清

泉則承黃梅雨水大缸置之幽處時時濯洗冬則
置淨室三月下旬方可移置庭除覆蔽日色然後
茂美本草云久服輕身
聰明不忘延年藥也

茱萸 崇禎烏程縣志土產者湖人用以作羹俗名
撥火

前胡 名醫別錄各處皆有出吳興者為勝根似柴
胡而柔軟本經上品有茈胡而無此晚來醫用之
素伏翼 萬厯湖州府志長興西山伏翼澗中多產
伏翼有素翼赤腹十載倒掛者

紫石英 西吳里語烏程縣壟山產

自然銅 萬厯湖州府志藥之屬出安吉

石鍾乳 萬厯湖州府志出黃龍洞

金剛纂 嘉靖安吉州志出天目其樹長不滿三四

尺多屈曲春夏亦無葉每觸其枝曳裾不前相傳

劉其末漬水水必毒曰人瘡

薤 談薤孝豐彭祖墓有薤刀鐮犯之輒有暴風疾

雨 嘉靖安吉州志世傳是薤
春不種而生秋不收而枯

鴨 弘治湖州府志水鄉人家蓄之者甚多

野鴨 崇禎烏程縣志鳬俗名野鴨冬月野鳬成羣而來動盈千萬聲如疾風

報春鳥 顧渚山茶記山中有鳥每至正月鳴云春起也至四月云春去也采茶者咸呼為報春鳥

黃雀 嘉靖浙江通志出德清形似雀而小惟冬春

間有之

萬歷湖州府志出德清十三都
蘆渚冬月肥美可食謂之披綿

豪豬 弘治湖州府志俗呼野豬脊有長鬣三四寸

利如錐今山間有之

猴 弘治湖州府志孝豐天目山多有之

白魚 魚經太湖出白魚梅後十有五日入時白魚

最盛謂之時裏白

西吳技乘五月夏至前五日吳興太湖中白魚向湖側淺水菰

蒲之上產子民得採之隋時貢於洛西吳里語白魚惟湖州有之蘇常郡則無也四五月間水漲其味尤佳葉氏避暑錄云太湖白魚冠天下即此也蘇人於此時以冰函之歸賣為佳品

鰱魚 崇禎烏程縣志湖魚之最佳者所謂小頭魚

出太湖者鱗白出龍溪者鱗黑更肥美

吳興掌故湖魚佳者

莫過於魴土名鰯魚大風起湖中即網得之郭西大龍溪中得者最佳

鯿魚 太平寰宇記浮玉之山茗水出其陰中多鯿

魚崇禎烏程縣志鯿一作鯿出太湖大者名刀鯿

甚肥美小者亦可為鮓

郭璞浮玉山鯿魚讚陽鑒動日土蛇致宵微哉鯿魚

食則不驕物在所感其用無標

鰻魚 歸安縣志三月間肥美可食不減銀鰻

鰻魚 弘治湖州府志出湖蕩最肥冬月尤美

銀魚 魚經其形纖細明瑩如銀太湖之人多鱸以

鬻焉長者不過三寸吳興掌故出安吉州梅溪之

下其品上美

崇禎烏程縣志銀魚在蜆蚌上寄生者甚小色白如銀東坡贈孫莘老詩

今日駱駝橋下泊試看修網出銀刀一名鱠殘魚又謂麪條魚相傳吳王食鱠棄其餘水中又名王

餘大者有尺許長名串子銀魚

小魴魚 吳興掌故春三月有一種小魴名鰲沽大

者三寸

烏鱧 吳興掌故烏鱧極多湖人少食者葆光集載

雪人漁者將簞籃捕魚往收之際見一鱧長數尺

枕簟上將鐵叉射之不中看簞內有小鱧魚者知其子也隱候之良久復至漁者悟而祝云若有變當放爾子魚乃吐黃氣一條上有一僧長數寸頃乃沒漁者駭而放之湖人好傳其事故鮮食者

鰻 吳興掌故鰻乃寄生非胎卵物也烏鰂鬣上春深有細蟲即鰻也稍能游泳即脫去松江秋深鰻始盛謂之落鰻湖中止食春鰻鰻至秋涼始去湖入海

異形魚 西吳里語孝豐天目山上有兩池其泉甚
美有異形之魚

魚鮓 王羲之吳興鮓帖今作北方脯二夾吳興鮓
二器蒜條四千二百蔡寬夫詩話吳中作鮓多就
溪池中蓮葉包為之味比餅缶中者尤佳張文規
詩云食有吳興鮓白居易詩云就荷葉上包魚鮓
是也

鋪花鱸膾 西吳里語鱸膾唐吳德昭善造時人嘲

之曰繪若遇吳縷細花鋪若非遇吳費醋及葫江
東呼蒜為葫蘇東坡云吳興庖人斫鱸膾亦足一
笑鄉土以此為盛饌製時鋪成花草鸞鳳或詩句詞
章務臻其妙造齏亦甚得法謂之金齏玉膾

綠蛇 談薈顧渚山頰石洞有綠蛇長三尺大類小
豬好棲樹杪視之若輩帶無毒能飛

蟹 成化湖州府志蟹在九十月間甚肥美出曹溪
者尤佳

吳興掌故相傳太湖產紫鬚蟹自爛溪以
東至分湖皆可得之昔人謂蟹腹有貞稻

芒霜降後入海輸與海神此大誕妄蟹子未成時曰黃黃中有細骨黃依以生非稻芒也入海則黃化為子而芒亦漸長至春深散子則芒亦輸出蟹腐矣好事者傳會大率如此不但蟹芒也

蝦 弘治湖州府志出太湖色白軟而味鮮

螳 西吳里語德清長橋下螳味特佳

蠶 吳興掌故湖人養蠶看火都聽命於天時而古

法則以人力勝之古人立蠶室甚密縈簾重蔽之南風則閉南窗北風則閉北窗內設火炕五處蠶姑以單衣為寒煖之節單衣覺寒則添火覺熱則

欽定四庫全書

卷一百二

減火一室之內自地至屋無不暖之處故天時不能損其利也又飼蠶備葉荒有二法葉少時以白米粉摻於葉上餌之其絲更光白而紉又秋葉未落時採完好者曬乾為細末常置暖處蠶時遇雨葉濕則以乾末摻葉上均其水氣兼乾葉易飽難饑

西吳枝乘吳興以四月為蠶月是月也有鳥飛其聲曰著山看火湖民謂之蠶鳥又有小蝦亦

以蠶時出市民謂之

蠶花蠶熟則絕無矣

謹按蠶桑之法莫勤於湖民蠶月之際合村閉戶婦女蓬垢曉夜不眠良可憫也惜湖民不善組織

絲成多貿別郡是
以資其利者薄焉

田雞 崇禎烏程縣志鼃類不一色青而花者至秋

肥美可食俗名稻花田雞又名水雞

綾

西吳里語唐湖州貢鳥眼綾

弘治湖州府志湖綾唐時充貢謂之

吳綾今有二等散絲織者名為紕綾合線織者名為線綾其綾練染光彩異於他處惟郡城織之其

外俱無

紗

崇禎烏程縣志吳興紡紗無花者曰真紗最白

者曰銀條紗有花者曰葵紗軟紗縐紗又有夾織

紗又有包頭紗惟雙林一方織之

絹 萬歷湖州府志有官絹有生絹惟局絹有五色
可同嘉興

紬 萬歷湖州府志有水紬有紡絲紬出菱湖者佳
苧布 弘治湖州府志白編布即今白苧布又有麻
布

黃草布 弘治湖州府志出璉市有極細者暑月可
為衣今所出止可作帳不堪服

苧 太平寰宇記德清縣苧溪以貢苧為名

絲 西吳里語湖州蠶絲有頭蠶二蠶頭蠶為上細

而白者謂之合羅稍粗者謂之串五又粗者謂之

肥光合郡皆有而獨盛於歸安

西吳枝乘其絲以三繭抽者謂合羅

絲歲以充御服見聞雜記湖絲絕海內歸安為最次德清其次嘉之崇德桐鄉杭之仁和

同功縣 西吳枝乘以兩蠶共作繭者為同功縣值

即倍常

鵝脂縣 舊浙江通志武康出

香 太平寰宇記長興縣藝香山昔西施種香之所
筆 西吳枝乘吳興毛穎之技甲天下元時馮應科

者擅長至與子昂舜舉並名今世猶相沿尚之皆

腕毫也弘治湖州府志出歸安善璉村

崇禎烏程縣志湖筆

著名時製有蘭蓋為最勝葉石林云製筆之法桀者居前毳者居後強者為刀吳者為輔叅之以麻束之以管固以漆液澤以海藻濡墨而試直中繩勾中鈎方圓中規矩終日握而不敗故妙

硯

吳興掌故思陵翰墨志云宋虞緜論文房之用

有吳興青石圓硯質滑而淳墨殊勝南方瓦石今

茗雪間不聞有此石或無好事者發之

毛扇 嵇含羽扇賦序吳楚之士多執鶴翅以為扇

今湖城人製鵝毛扇頗可却暑其柄即將羽管劈絲編織大抵皆用鵝羽其貴重者用鶴羽飾柄用瑪瑙檀香揀銅絲為釘
較其價有至數金者

鏡 西吳枝乘鏡以吳興為良其水清冽能發光也

最知名者薛氏

崇禎烏程縣志湖之薛鏡馳名薛抗人而業於湖以磨鏡必用湖水

郡舊有鏡坑工人鑄鏡得

訣大小方圓照鑒若一

靈壽杖 孝豐縣志天目山仙丈峯產靈壽木可為

杖

銅錫 明一統志武康安吉長興出銅安吉出錫

桐油 弘治湖州府志安吉山中多桐其子可榨為油

卞山石 雲林石譜湖州卞山在羣山最為齒岸奇巧羅布山間嵌空礪魄色類靈璧而潤青尤勝葉少蘊蓋堂以就其景故號石林石上有李唐遊人題字自顏魯公而下悉署焉

武康石 宣和石譜湖州武康石出土中一青色一

黃黑而斑其質頗燥不堅而渾然巉巖峯巒雖多

透空渲眼亦不甚宛轉採人入穴石多臥生甚廣

潤度奇巧處以鐵鑿搨取之或多細碎大抵石性

扁側多刷道摺疊勢浙中假山藉此為山脚石座

間有險怪尖銳者即側立為峯巒頗勝青州穿眼

宛轉渾然可觀

春風堂隨筆武康石色黑而潤文如波浪人家園池疊假山以此為

奇大至尋

丈者絕少

桃花石 吳興掌故安吉在唐武德中改名桃州皎然送安吉康丞詩云君吏桃州尚寄迹桃州採得桃花石則名州之義本以桃花石為當時所重又皎然有桃花石枕歌云卞山幽石產奇璞荆人至今采不著則桃花石又出卞山

碑石 吳興記白鶴山石堪為碑材江乘記云負丘山石精好不藉吳興

礪石 名勝志歸安縣仁玉山隔水有一小山山石

可以作礪

紙帳 嘉靖安吉州志荻浦多桑皮紙疊而為帳有
若魚鱗正所謂梅花紙帳也然亦不甚佳

麻屨 舊浙江通志湖州出絅麻潔白如苧質少脆
鄉人取以捆屨

焙籠 嘉靖安吉州志土人仿杭製為之用大竹則
堅細則弱或織為花鳥形狀亦可觀

蘆席 崇禎烏程縣志蘆溪岸多有土人採之織為

席

丹礪 萬歷湖州府志葛仙翁遺製出長興方山窰
水碓 嘉靖安吉州志惟孝豐以上有之中虛可容
黍數斗不人而運或截竹置其中待水自舂搗爛
如泥輒用竹簾撈起堆積蒸曝便可成紙今之黃
紙白紙是也

魚籠 嘉靖安吉州志笑灘者土人取魚別名也黃
梅雨溢魚自太湖逆上探其往來處破竹橫溪中

下置竹籠有倒絲水風相激則竹鳴魚疑其鳴者避之不知籠之不鳴者有機巧伏焉進不能出一笑而取故名又有網斗撈之者謂之魚媒

鹿網 嘉靖安吉州志鹿網出青松里者為上有生致之者

虎箭 嘉靖安吉州志出孝豐有無名藥草土人取草熬膏用以點鐵箭之首遇虎發之無不中者

鉗鍋 明一統志長興縣出

礪灰 明一統志長興縣出

茗帚 吳興記葦花蘭心曰茗吳興溪傍多生茗草
可作帚俗呼為茗帚

浙江通志卷一百二

欽定四庫全書

浙江通志卷一百三

物產三

寧波府

稻 成化四明郡志杭稻有早雪產象山粳稻有朱
口粳鐵粳虎皮粳產慈谿黃香粳產奉化烏粳產
象山

稷 嘉靖寧波府志稭稷也或謂之粟非也呂氏春

秋曰飯之美者有陽山之稌高誘曰關西謂之糜
冀州謂之𦵏字書云𦵏糜稌也釋本草者云楚人
謂之稷大抵稌稷糜𦵏一物四名各因其俗耳鄞
象產同

麥 成化四明郡志麥有三種大麥小麥蕎麥宋淳
熙中象山縣西隴中有麥一莖兩岐有司圖上於
朝

豆 定海縣志岱山蓬萊鄉周圍四百餘里土厚田

瘠所產豆多穀少

蓖麻 至正四明續志出明州夏生苗葉似葎草而
厚大豆亦有節如甘蔗高丈許秋生細花隨便結
實

赤莧 學齋佔畢明州有赤莧山土傳赤莧乃仙人
所種

蔓青 嘉靖寧波府志蔬之屬產鄞縣

雪裏燕 野菜箋四明有菜名雪裏菜甕頭旨蓄其

珍莫比雪深諸菜皆凍此菜青青燕尤美

香菜

嘉靖寧波府志產慈谿

芥辣

嘉靖寧波府志產象山

石花菜

普陀山志生巖石間色近紫菜而葉碎小

一名鳳尾與紫菜皆洛迦山之產

紫菜

至正四明續志生定海昌國海岸一云出伏

龍山者著名乾則黑

鹿角菜

舟山志海苔之類生東海近水巖上

苔菜 吳都賦注生海水中正青狀如亂髮乾之赤

鹽藏有汁名曰濡苔產象山

至正四明續志採納之窖片片整之俗呼

苔脯又一等綠苔乾而作小束謂之苔結

山藥 至正四明續志一名薯蕷出四明者佳春生

苗蔓延離間莖紫葉青有三尖角夏開細白花秋
生實於葉間狀如鈴二月八月採根令人刮之白
色為上青黑者不用曝乾入貢

番薯 普陀山志如山藥而紫味甘種來自日本

韭薤 名勝志昌國境有大韭大薤諸山俱在東南
大海中大韭大薤皆其山中所產也

石蒜 普陀山志根似蒜一莖數葩狀如龍爪而小
銀筍 四明山記雪竇山北巖生石乳其峯非人可
升有毛竹銀筍其毛竹自生毛筍若銀筍即銀鑛
如筍或云毛竹筍白如銀

萑 舒亶四明雜詩聖米歉年萑自注儉歲明人呼
萑根為聖米

菌 避暑錄話四明山谷多產菌種類不一食之間
有中毒者蓋蛇虺毒氣所薰蒸也有僧教掘地以
冷水攪之令少頃取飲皆得全活謂之地漿楓樹
菌食之笑不止俗言笑菌居山不可不知此法

芹 至正四明續志奉化溪澗多生

禹餘糧 成化四明郡志生東海地澤及山島中狀

如鷺鴨卵

本草綱目海米亦篩草之類也生海洲
上一名自然穀即禹餘糧之類方孝孺

海米行海邊有草名海米大非蓬蒿小非薺婦女
攜籃畫作羣采摘仍於海中洗歸來滌釜燒松枝

煮米為飯充朝飢莫辭苦澀
咽不下性命可假待豐時

松 嘉靖寧波府志五縣皆產

櫛 嘉靖寧波府志鄞奉產櫛

四色樹 成化四明郡志四明山北一峯頂上有天
井山四面各生一色樹東生梓西生松南生柏北
生檉及黃楊

海檜 老學菴筆記有二種海檜夭矯堅瘦皆天成
又有刻削蟠曲而成者名土檜海檜絕難致凡人

家所有大抵土檜也

至正四明續志海檜枯柏類也葉尖如枚其質體刻成龍

鳳形懸根而植之盆可致遠

梭 成化四明郡志鄞縣產梭其毛用作梭帽梭鞋

烏桕 嘉靖奉化縣志縣有九峯山九峯突兀產多

烏桕秋霜葉紅爛若春花

觀音柳 嘉靖寧波府志奉定間有之細柳一名觀

音柳青翠如髮而垂春三月開紅花如蓼

雞骨樹 嘉靖寧波府志產定海

李 消夏錄軍庭李產奉化成化四明郡志李子出
鄞小溪仲夏有粉紅李蠟李豐山李

楊梅 成化四明郡志出奉化有邵家塢許家塢金
家塢韓家晚大荔支小荔支鄞之小溪亦有之色
紅不逮奉化之紫黑產東湖色白者名酪蜜脚

枇杷 至正四明續志一名盧橘出慈谿味甘核細
如椒子

林檎 至正四明續志出慈谿一名花紅

藤梨 嘉靖寧波府志一名羊桃產象山

芋栗 至正四明續志極小而味甘出慈谿

榧 成化四明郡志翠山香山雪竇皆有惟雪竇尤

著名

金柑 至正四明續志出慈谿飽霜者甘定海縣志
出馬輿沙蛟者佳不能多得

金橘 嘉靖浙江通志寧波金豆橘形似豆味甘香

勝於大橘

香瓜 至正四明續志金子瓜形如西瓜而小有紅

黃黑三色出同畧者佳

此即香瓜

青櫛子

松陵集出四明山極甘

紫桃軒雜綴四明山產青櫛子其樹

不可見每於石上得之蓋洞天中物神仙所秘耳
四明七觀珍木嘉草葳蕤對萼榮咄甘嶠芳有果青
櫛李光四明山青櫛子詩羽幃新翻帝從回餘歡
未盡玳筵開醉拋青子香泥上留與仙家取次栽

蔗 嘉靖鄞縣志產鄞山下稱為蔗田

糖水 容齋隨筆甘蔗所在皆植獨福唐四明番禺

廣漢遂寧有糖水

楊萬里冰糖詩亦非崖蜜亦非
錫青女吹簫凍作冰透骨輕寒

清著齒嚼成

人跡板橋聲

謹按糖霜有譜製法絕佳今閩人治此為利浙民多種蔗而不知造糖惟寧郡能作冰糖推其法亦可治霜也

山茶 普陀山志山中最多數千百本樹高數丈丹

葩滿枝望之如珊瑚樹

成化四明郡志
海紅花產定海

貼梗海棠 嘉靖寧波府志產鄞慈土人稱闌路錦

丹桂 藏一話腴象山士子史本有木犀忽變紅色

異香因接本獻闕下高宗雅愛之畫為扇面仍製

詩以賜從臣自是四方爭傳其本歲接數百史氏
由此昌焉成化四明郡志今象山所產者色深而
香烈他處初無號為丹桂移之四方則色香少損

此地氣然也

宋高宗有獻紅木犀花者愛之畫為扇面以賜從臣詩月宮移就日宮栽

引得輕紅入面來好向烟霄承雨露丹心一點為君開秋入幽巖挂影團香生粟粟照林丹應隨王母瑤池宴染得朝霞下廣寒

小白花 普陀山志如瑞香而白葉亦微似春月花

開香散巖谷

雲麓漫抄山谷山礬花詩序云江南野中有一種小白花木高數尺春開

極香野人號為鄭花王荊公嘗欲求此花栽作詩而陋其名予請名曰山礬野人採鄭花葉以染黃不借礬而成色故名山礬海岸孤絕處補陀落迦山譯者以謂小白花予疑此山礬花爾不然觀音老人何以端坐不去耶祝穆小白花詩玲瓏葉底雪花寒清畫香薰草木間移植小軒供宴坐恍疑身在普陀山

杜鵑花 明一統志四明山出嘉靖寧波府志土人號石巖花產奉化

挂蘭 嘉靖寧波府志一名見風蘭生鄞象間

荻蘭 至正四明續志一幹數花比蕙則瘦而香過

之出昌國巖竇間

瑞香 花譜出明州又名睡香處處庭院植之

王十朋瑞

香花詩長向春前臘後開要將風味鬪梅魁客從廬阜夢中得根自鄧山佳處來風拆錦囊香不斷日烘寶蓋翠成堆定須移向梅溪去栽伴吾廬桂與槐

紫茉莉 普陀山志不種自生蔓延至里許

菊 至正四明續志種類頗多有紫莖而氣香葉厚至柔嫩可食者其花微小味甚甘

木屑花 嘉靖寧波府志產定海

金雀兒花 成化四明郡志產奉化

雀李花 成化四明郡志產奉化

毛竹 四明洞天記叢生澗邊

白竹 名勝志奉化自鮎埼而東為新嶺山其嶺生竹高僅四五寸葉皆色白

紫竹 睽車志紹興中四明有巨商泛海阻風抵一山下因登絕頂有梵宮焉窻外竹數箇枝葉如丹求得一二竿截之為杖每以刀鏤削隨刃有光至

一國有老叟曰君親至補陀落迦山此觀音坐後
旃檀林紫竹也

方竹 嘉靖定海縣志葛仙翁煉丹於靈峯植箸於
地化為竹而方今巖谷間生方竹

茶 茶經出浙東以明州次鄞縣生榆美村晁以道
詩官有白茶十二雷自注四明茶名至正四明續
志茶出慈谿在資國寺山者為第一開壽寺側者
次之每取化安寺水蒸造精妙如雀舌嘉靖寧波

府志茗畧山在慈谿縣西北其山多產茶萬厯象山縣志茶出朱溪者佳象山縣志鄭行山產佳茗珠山更多定海縣志定海之茶多山谷野產又不善製故香味不及園茶之美五月時重抽者曰二鳥苦澁不堪產桃花山者佳普陀山者可愈肺癰血痢然亦不甚多得

酒 名酒記明州金波酒

雙魚酒 舒亶四明雜詩酒罌雙印貴注俗重雙魚

酒

鹽 游宦紀聞四明鹽白以簷盛貯邸翁曰塗中走
滴將若之何可用煨皂莢一挺置其中即無慮矣
甘草 四明山記四明山心有五朶峯南一巖有石
穴通泉流於梨洲穴生甘草

附子 明一統志各縣出附子

楮實 至正四明續志出明州有二種其實如彈丸
青色七月漸紅九月採水浸去皮穰取子日乾

海艾 羣芳譜艾一名醫草一名冰臺一名艾蒿一

名黃草處處有之產四明者謂之海艾

本草綱目
艾葉出明

州至正四明續志苗莖類蒿而葉背白三月
三日五月五日採舊志云出昌國峯峇山

黃藥 圖經本草出明州藤生高三四尺苗莖類蒿

十月採根

蜀漆 至正四明續志本草云出明州葉似茗而狹

長莖圓有節紅花青萼三子為房五月採葉八月

採根治瘡要藥

天明精 至正四明續志出明州夏秋抽條如薄荷
花紫白色葉如菰而小故南人謂之地菰

骨碎補 至正四明續志本名胡孫姜入貢其根生
大木或石上多在背陰處引根成條上有黃毛及
短葉附之無花實惟根入藥採無時削去毛用之
筋子根 本草拾遺生四明山苗高尺餘葉圓厚光
潤冬不彫根大如指亦名根子味苦溫無毒主心
腹痛不問冷熱遠近惡氣霍亂蠱毒暴下血

承露仙 本草拾遺伏雞子根生四明天台一名

承露仙其蔓延生葉圓薄似錢根似鳥形

昆布 本草綱目如繩索狀出浙東者大葉似菜蓋海中菜也

香蓀 成化四明郡志慈谿縣孫湖多產香蓀故名訛而為蓀

赤堇草 成化四明郡志鄞縣東赤堇山產即烏喙絡石草 至正四明續志出明州葉圓如細橘正青

冬夏不彫著處即生根鬚包絡石上以得名花白

子黑與薜荔相類

香草 香山記巖谷流香即大蓬山之支也上有佛

蹟巖多產香草

長生草 四明山記生山中取之懸崖壁間雖槁得

水復鮮

成化四明郡志卷柏俗呼為長生不死草
生四明山謝靈運山居賦云卷柏萬代而

不死

鶴 成化四明郡志紅鶴產明州海島

萬厯象山縣志內田懸海

周環一百餘里高出海中
諸山山多鶴鹿水多海錯

鵲 至正四明續志出海島中然亦少得

畫眉 至正四明續志出慈谿山谷間

江鷗 舟山志短頸鳬也形小而多羣日處海濱或
飛鳴於山次日必起大風

青鸞 客越志游東錢湖青鸞大如鶴羣翔碧藻間
烏鳳鵲 客越志身黃味黑光如漆皆吳中所無

頻伽鳥 至正四明續志昌國補陀山有之鄞縣句

章北巖亦有

野豬 舟山志生定海山谷間出則田禾園蔬無遺
九節狸 至正四明續志狸有數種然貴在九節狸
玉面狸極少

海獺 至正四明續志大如狗脚下有皮如人胼拇
毛著水不濡生海壩

貉 至正四明續志貉踰汶則不生地氣使然也今
二州四縣以皮賦

杜部魚 成化四明郡志出溪河長四五寸

石首魚 能改齋漫錄兩浙有魚名石首云是明州

來問人以石首之名皆不能言余讀張勃吳錄載

吳有石首魚至秋化為冠鳧頭中有石

嶺表錄異石首魚狀

如鰮魚隨其小大腦中有一石子如蕎麥瑩如白玉海族志腹中臊可作膠成化四明郡志石首魚首有魷細如牙堅如石故名石首臘月則鞞皮為良三月八月味次之孟夏之交緣海之民以巨艘小舠競入洋山海中捕取潮汛往來有限謂之洋山魚

春魚 成化四明郡志形似石首而小每春三月業

海漁人競以舟載竹莆出海捕之名曰捉春冬月莆中得者名曰莆春

梅魚 海味索隱鯉魚黃魚各有一種肉與味亦自不同即如吾郡梅魚比黃魚極小肉與味正相似閩中呼為小黃魚其鱗色燦爛金星如大黃魚也然又各自一種今合鯉魚為一種誤矣

鰲魚 天啓慈谿縣志鰲身多刺長不過五六寸肥腴可食晉虞肅父答晉帝云天時尚溫鰲未熟是

也至正四明續志鯊魚又曰刀魚頭狹薄其腹皆如刀刃故名其長大者可尺餘子多而肥明州

人夏初曝乾可以致遠又可為鮓其子乾名寸金鯖子又云糟之可作湯嘉靖寧波府志青鰾冬月

尤美海錯之佳者產奉化

箭魚 成化四明郡志即江湖鱖魚海出者最大甘

肥異常

箸魚 成化四明郡志其形似箸生海中極大名鰓

鰻

規魚 補筆談鱖魚吹肚魚非本草所載河豚規魚

浙東人所呼其生海中者腹上有刺名海規吹肚
南人通言之以其腹脹如吹也

魴魚 至正四明續志形圓似扇無鱗色紫黑口在
腹下尾長於身如狐尾大者曰鮫魴與鮫魚可錯
靶其次曰錦魴去沙煮爛與鼈裙同又次曰黃魴
差小背黑腹黃其餘有斑魴牛魴虎魴魴字或作
魴

馬鮫魚 至正四明續志形似魴其膚似魴黑斑最

腥

鯊魚 成化四明郡志鯊魚之名有白滿黃頭白眼
白蕩青頓牛皮鹿文燕尾犁鏡熨斗了髻劍刺及
斑鯊狗鯊鰈鯊鱣鯊虎鯊香鯊鋸鯊其類甚多

吹沙魚 埤雅鮫鮓常開口吹沙性善沈大如指狹
圓而長有黑點俗呼為新婦臂味甘今奉化鮫崎
鎮有之名吹沙魚頗以為珍品

琵琶魚 成化四明郡志華臍一名老婆魚一名鰻

魚蓋其腹有帶如帔子生附其上故名鰻其形如
科斗而大者如盤吳都賦注曰此名琵琶魚無鱗
而形似冬初始出者俗多重之至春則味減矣
黃滑魚 至正四明續志似春魚而肉細冬月得之
為美又一種烏眼白眼皆相類

鰻魚 爾雅翼鰻形如惠文如便面惠文武冠名便

面古扇名也

至正四明續志鰻魚形如覆斗青褐
色十二足長五六寸尾長一二尺其

殼堅硬有橫紋一線軟可屈摺尾有刺口足皆在
覆斗之下海中每雌貪雄漁者必雙得牝者有目

牡者無目韓退之詩鯢
實如惠文骨眼相附行

四腮鱸 成化四明郡志產海中四腮有江鱸差小
而兩腮味淡有塘鱸形巨不脆

肋魚 至正四明續志似箭而小身薄細骨滿肋明
州夏初多出

鰻魚 至正四明續志似鯉生淺海中專食泥身圓
口小骨軟肉細

烏鯽魚 酉陽雜俎形如算袋口傍兩帶極長遇風

則蚪前一鬚下矧其腹有墨遇大風輒放墨方數尺以混其身然羣行水中人見墨水至輒可筍羅而得之骨如通草可刻名海飄蛸入藥

短魚 海族志頭縮而短色紅為鰲極美

銀魚 至正四明續志口尖身銳如銀條又一種極

小名麴魚

爾雅翼王餘即此類舊志載在比目項下非也

火魚 至正四明續志頭巨尾小身圓通赤故以火名之又有一種名竹麥魚頭身俱扁微紅其形頗

相類

蛇魚 圖經本草蛇魚一名水母生東海形如覆笠

腹下有赤血如芝謂之頭常泛海有蝦立其上其

白肉縷切用礬浸謂之水母線可以致遠

成化四明郡志

蛇魚本草作蠮一名水母
生東海形如覆笠肉白

海鰐 舟山志大者長數十丈海中浮載如一二里

山俗呼為浮礁舟行避之

風鰻 成化四明郡志生海中者可六七尺冬月鱗

之名風鰻

彈塗 至正四明續志闌湖形如子鰕而短大者如人指潮退數千百跳躑塗泥中土人使小鉤取之
一名彈塗椒醬腊之

鰻鮓 至正四明續志形似魴以鹽浥之曝為鮓名曰鰻鮓俗又呼曰老鰻鮓去皮生擘成絲充果飣
魚鮓 嘉靖奉化縣志袁村所產最美

海鮮 鶴林玉露有浙人侍壽皇宴因談肴核上問

其鄉里所產對曰螺頭新婦臂龜脚老婆牙皆海

鮮也

吳萊初海食詩故人喜我來為我具杯盤盤中何所有海族紛攢攢盲風吹衣冷蜚雨灑

席寒春魚白如刀小棹臨碧湍淡菜類山結巨鑊就石剝水母或潮捲蝘蚱乃泥蟠蛟鼉惜不得沉問龜與鼈其餘亦瑣碎充此一日歡洗濯烟瘴氣磨礮沙淤癥非歟嗜土炭否則殊醎酸珍須壓狔鸞異且輕馬肝褻味分罩網腥涎雜瓢簞奈何齊魯邦徒設邦莒餐對之輒棄置誰謂吾腹寬川澤禮當爾勿云行路難

謹按陸雲答車茂安書云斷遏回浦隔截曲隈隨潮進退採蚌捕魚其蚌蛤之屬目所未見耳所未聞品類數百難可盡言據此則寧郡鱗甲之屬舊志不傳者多矣山海之利天自產之名雖不傳而

物未嘗缺也特
博識者難爾

江瑶柱 老學菴筆記明州江瑶柱有二種大者江

瑶小者沙瑶然沙瑶可種逾年則成江瑶矣宛委

錄奉化縣四月南風起江瑶一上可得數百如蚌

稍大肉腥韌不堪惟四肉柱長寸許白如珂雪以

雞汁淪食肥美過火則味盡也

侯鯖錄玉珧柱厥
甲美如珧玉肉柱

膚寸曰江珧柱郭景純江賦云玉珧海月吐納石
華退之謂馬柱甲是也世人不用此珧字是未知
耳能改齊漫錄紹聖三年詔明州歲貢車螯肉柱
五十觔俗謂之紅蜜丁東坡所傳江瑶柱是也李

本江瑤柱詩異味分甘及老饕令人斷酒不能牢
元胎剖出雲間月細穀熬翻海上濤春雨河豚忘
下箸曉霜郭索罷持螯東坡向
未知名字媿美空將荔子褒

蠅房

嘉靖寧波府志形如駝蹄附巖石生相連如

房左顧者壯右顧者牝房內有蠔肉亦有柱肉之
大小隨房每潮來諸房皆開有小蟲入則含以充
腹鮎崎海巖生者僅如人指甲挑取肉謂之梅花

蠅扈竹結成謂之竹蠅

劉子革食蠅房詩蠅房生海壖堅頑宛如石其中儲

可欲雖固必生隙嵌晶各包藏礫礫相附積終逢
霹靂手妙若啟扃鐫鎖灼諒難堪島不吐餘瀝南

庖富腥盤豈惟此稱特吞航大絕倫梯巒萬夫食
針鱗九牛毛小嚼逾千百光螺暈紫斑藍膏湛金
色水母脆鳴牙章舉懸疣密烏粘力排莽貼石不
可索妾魚戲浮波媚鮐雌雄匹蟹躁輒橫驚鼈縮
常畏出車螯不服箱馬鮫非駿跡江瑤貴一柱嗟
豈棟梁質骨柔競愛鰓多鯁乃斥蚶魴鮓赤文
肉黑魚之賊鰓鰾鯉鰻鮎鮓鮓鮓鮓鮓鮓鮓鮓鮓
小瑣冗難盡述包涵知海量長養荷天德貧生族
類繁失地波濤窄網罟人設險甘鮮已為厄紛然
均適口流品當別白微物倘見知捐軀寧足惜

海扇

任士林海扇詩注海中有甲物如扇名曰海

扇文如瓦屋三月三日潮盡乃出

任士林海扇詩
漢宮佳人班婕

好香雲一筐秋風初網蟲蒼蒼恩自淺猶抱明月
馮夷居至今生怕秋風面三月三日纔一見對天

搖動不如烹肯
向五雲清暑殿

結 元豐九域志結蚌也結崎亭其中多結故以名

亭

四明七觀寸鮎腹蟹亭以崎名注奉化鮎崎山產鮎顏師古曰鮎蚌也其長一寸廣二分有小

蟹在腹中定海縣志璫蚌如螺半身飢則蟹出求食蟹入則飽

淡菜 海族志亦名殼菜形似珠母一頭尖中銜少

毛多生南海

本草釋名浙人呼淡菜曰東海夫人娜嫫記又名文齧玉環志去其殼不

著鹽而乾之故名淡菜四明七觀蚌菜疲民君嚴奏免注四明歲貢淡菜蚶蛤之屬唐孔戣以為自

海抵京道路

役夫奏罷之

蝤蛸 成化四明郡志并螯十足生海邊泥穴中小而黃者謂之石蝤蛸最大者曰青蟬小者曰黃甲後足濶者曰撥棹子城東江濱有蝤蛸廟俗傳有漁人獲一巨蝤蛸為巨螯鉗而死今廟即其地前賢多呼四明為蝤蛸州舒懶堂述里諺云八月蝤

蛸健如虎埤雅云蝤蛸兩螯至強能與虎鬪

雨航雜錄

浙蟹有數種一曰蝤蛸南人謂之撥棹言力可撥棹也隨大潮退殼一退一長一曰蟬乃蝤蛸之大者兩螯無毛一曰擁劍一螯大一螯小常以大螯鬪小螯食又名桀步一曰虎蟬大者有虎斑文一

曰招潮潮欲來出穴舉螯迎之一曰灘塗一曰蜂江一曰蜚蜚似蟹有毛而赤性極寒一曰彭越即彭蠡也一曰蛄朴大於蜚蜚黑斑有文以大螯障日用小螯以食一曰沙狗穴沙中見人則走或曰沙鉤從沙中鉤取之也味甚美一曰數九競搏土作丸滿三百而潮至一曰蘆虎兩螯正赤不可食一曰蜃似彭越而小一曰蠟肉殼而多黃其螯最銳斷物如芟刈焉食之行風氣

螺

定海縣志生深海中殼可為酒杯者曰鸚鵡螺

厖白而香者曰香螺殼尖長者曰鑽螺味次之有

刺者曰刺螺其味辛者曰辣螺又有拳螺劍螺斑

螺丁螺

圖經本草海螺即流螺厖曰甲香生南海今明州有之或以台州小者為佳諸螺之

中此肉味最厚南人食之南州異物志云甲香大者如甌面其屬雜衆香燒之益芳獨燒則臭合香者用之又有小甲香狀若螺子取其蒂修合成也海中螺類絕有大者珠螺瑩潔如珠鸚鵡螺形如鸚鵡頭並可作杯梭尾螺形如梭今釋子所吹者皆不入藥

蛤 至正四明續志蛤蜊亦云圓蛤殼口有紫暈者肥

美善醒酒黃山谷詩商略督郵風味惡不堪持到

蛤蜊前

鄞縣志黃蛤每一潮生一暈殼有紋海濱人以苗栽泥中候其長而取之本草會編

蛤生海中浙人以其肉充海錯其殼煨作粉

海蝦 至正四明續志海中蝦有赤白青黃斑數色

青者有大如兒臂長尺餘鬚長三尺土人珍之梅熟時曰梅蝦蠶熟時曰蠶蝦又有生於潮生於河皆青黑色生於江白色

蝦鮓 太平寰宇記明州舊貢紅蝦鮓

蝦米 太平寰宇記產明州

蛭 至正四明續志生海泥中長二三寸如大指肉甚肥含津口常開不合

蚶 郭璞江賦洪蚶專車至正四明續志有瓦壘蓋

殼上有稜似之故名有芽蚶殼稜細而肉肥多出
鮎崎亦採苗種之海塗謂之蚶田

蚶 鄞縣志生於海巖或簷竹又一種曰老婆牙

蚶 至正四明續志俗呼生進似蛤而長殼有毛亦
呼毛蛤一曰蠍蚶

章巨 成化四明郡志大者名石拒居石穴人取之
能以脚粘石拒人又別有一種生海塗中名望潮
土人呼為塗蟾一種曰鎖管脚短無釘

肘子 成化四明郡志殼下尖而上濶中有肉惟取肉為饌

土鐵 海味索隱一名泥螺出南田者佳梅雨收製海鏡 定海縣志瓦楞子本名鬼蛭一名蠟一作蚶殼圓厚而有紋儼如屋瓦楞海月形圓如月亦謂之海鏡土人鱗次之為天窻

綠毛龜 成化四明郡志宋祥符七年明州獻青毛龜今漢洞有小如錢者取育於池亦漸長大

蜥蜴 成化四明郡志形如蝮蛇四足皆有金絲生
山石潭中禱雨即應凡禱出水面罩至城將雨則
送故處

綾 四明七觀注明州土貢吳綾交梭綾

畫絹 嘉靖浙江通志寧波畫絹色白絲勻宜畫

皮紙竹紙 至正四明續志皮紙出鄞縣章溪竹紙
出奉化棠溪亦有皮紙

硯 硯箋明州石硯石甚瑯見米帖

假倭扇 七修類藁寧波人造泥金彩漆縹霞宣德

間遣人至彼傳其法

油 成化四明郡志寧波油共五品麻菜豆桐柏

魚膏 太平寰宇記明州脂澤悉用魚膏

席 成化四明郡志甬東多種席草民以織席為業

著四方曰明席

佛祖統紀建炎三年十二月浙東制置使張俊與金人戰於明州西

門俊見民間多織席遣兵斂取之以重席覆於路金騎踐席上皆足滑而仆因急擊之斬獲甚衆

熏籠 至正四明續志明州熏篝焙籠他郡鮮有

漆器 嘉靖浙江通志 寧波出描金漆器

謹按寧郡切近海洋自設立海關以來外洋諸貨畢集居民遂摹仿為之如漆器之類雖不及洋製而民間亦資之以為利他如紙扇銅硯小刀之屬亦多

金錫 山海經句餘之山多金錫

銅 明一統志奉化縣產銅

生鐵 至正四明續志廣船販至冶成器用釜差勝手磬 百寶總珍集明州多販到無破損聲圓長者為妙

五色石 四明圖經奉化縣烏峯臨溪其石五色似

花鈿

普陀石 池北偶談普陀巖石有大士像華鬘天然

竹林鸚鵡善才龍女形悉具琴客程生曾見數枚

琅玕石 宣和石譜明州昌國縣沿海近淺岸水底

生琅玕石狀似珊瑚或高二三尺漁獵者多得之

初出水色甚白經久微紫黑紋理如織枝幹一律

遍多圓圈跡扣之有聲稍燥土人不甚貴遠方多

裝治假山

奉化石 雲林石譜明州奉化縣諸山大石中每擊
取之即有平面石色微黃面稍潤扣之無聲其紋
橫裂兩道如細墨描寫一帶夾徑寒林烟露濛朧
之狀或濃墨點染成高林與無為軍所產石屏頗
相類

浙江通志卷一百三